

Cietfwen Aihih:

## Mbaenjgouz Fungsou Doiq Fwen Cienz Cingz

## 祈求丰收对歌传情的艾圩村山歌节

□ Veiz Lizli ingj Sinhyungz hoiz

Moix bi liggaueq ndwensam ngeihngux, Dava Yauzczu Swciyen Gyanghhih Yangh Aihih Cunh cungj banh ciengz cietfwen nauhyied ndeu, gyoengq vunzmbanj henzgyawj nem hekyouz daj dieggyae seiq fueng bet baih caenx daeuj ganj cietfwen, baenz bang baenz gyoengq, caemhcaiq doq byaij doq eu gij fwen gag bien haenx, humx comz daengz ciengzfwen Aihih angq gvaq ngoenzciet, vunzsoq dabdaengz song fanh lai vunz, hawj ndaw mbanj Aihih ndaetfwd hoenghwd.

Mbanjaihih youq giz gapgyaiq yienh Dava caeuq yienh Bahmaj, gizneix lij hwng riuz gij fungsug minzczu daegbied youh gaeuqgeq haenx. Cihugeq, liggaueq ndwensam seizcin doekndaem hainduj gaxgonq, rangh dieg neix cungj aeu banh aen yizsi caeqcuengq saenzbuz, mbaenjgouz saenzcoj doek fwn, baujyouh haeuxgwn fungsou, caemhcaiq youq yizsi caeqcuengq sat le eu fwen doiq fwen, doeklaeng cungj fungsug neix bienqbaenz le ngoenzciet, couhwdg cietfwen. Moix bi ngoenz neix, gyoengq vunz lai saujsu minzczu gij yienh yangh seiqhenz cungj comz daengz ciengzfwen Aihih, caenhcingz dwk doiq fwen lwnh cingz, dingq fwen gangjgoj, gyoengq mbauqsau caemh baenz bang baenz gyoengq dwk daengz gwnz cietfwen doiq fwen ra youx, mwngz gyaenz gou ndiep, cingzeiq laeglili, hamz gij cingsaenz minzczu caeuq vwnzva minzczu naekgywng nanwt.

Dwen daengz cietfwen Aihih, dangdieg lij riuz aen goj gyaundeis caemhcaiq siliengz ndeu. Riuz naeuz haj bak bi gaxgonq, Fanhgangj (yienh Bahmaj seizneix) miz dah sau Bouxcuengh gyaundeis simsoh youh dwg lwgyax haemzhoj ndeu, aenvih ndaw ranz gungz lai, mbouj ndaej doegsaw, ngamq cibseiq bi couh deng bik haq hawj bouxgvan ranzfouq beix de baenz cibhaj bi ndeu guh yah. Aenvih nienzgeij doxa lai, de mbouj nyienh caeuq bouxgvan caemhmbonq, baenz ngoenz daejsebseb mbouj dingz. Miz bi ndeu ndwensam ngoenz ngeihsam, de daj Mbanjminzan caeg deuz okdaeuj doq buet doq eu fwencieg, dai cungj mbouj ma ranzgan, itcig eu fwen daengz "Gamjai" (Gamjaihih seizneix), lienzdaemh eu fwen sam ngoenz song hwnz cungj dwg fwendaehaq, sing fwen siliengz simcieg. Gyoengq vunzmbanj henzgyawj dingqnyie le foenxfoenx humx gvaqdaeuj, dinghdingh dingq gij fwen de, caemh doenghcingz siliengz siengsim dwk raemxda doekbyoegbyoeg. Daengz haemh ngeihngux le, gyoengqvunz caiq hix mbouj dingqnyie gij sing fwen de lo, doeklaeng gyoengqvunz dingqnyie naeuz dahgyax gaenq youq ndaw "Gamjai" venjhoz dai bae, hoeng cix ra mbouj raen seihaiz, gyoengq vunzmbanj couh souj youq henz "Gamjai" daengz ranzrongh le cij mbouj sij ndaej dwk menhmenh sanq deuz. Miz vunz naeuz gij sing fwen dahgyax hawj diensaenz gamjdoengh lo, diensaenz gaenq sou de bae guh sienfwen. Baenzneix, moix bi daengz ngoenz neix, gyoengq vunzmbanj dangdieg cungj lumj doxiu gvaq nei comz daengz Mbanjaihih, doiq fwen cienz cingz, geiqniemh sienfwen, baiqfug mbauqsau gagnyienh doxaeu, mbaenjgouz ndaw bi fungsou.

Doengh bi neix daeuj, cietfwen Aihih ndaej daengz cwngfuj caeuq sevei gak gyaiq yawjnaek caeuq cihciz, hawj gij neiyungz cietfwen engq lai cungj lai yiengh, cawz doiq fwen danq cingzndiep le, gyoengqvunz caemh eu fwen haenhdanq gij cwngcwz hawj lwgminz souh'ik dangj raeuz, doiq fwen soncienz gohgi ndaem ciengx, ngoenzciet banh ndaej bi beij bi nauhyied, mingzdaeuz bi beij bi hung, baenz Gyanghhih Yangh aen binjbaiz vwnzva minzczu gig miz daegsaek ndeu.



▲Mwngz yawj ciengz doiq fwen, vunz cien dem vunz fanh.



▲Hekgviq comz daeuj daengz, simmaengx gingq vanj laeuj.



▲Yienznaeuz nyaengq hongnaz, vid ga caemh yienjheiq.



▲Gyoengq beixnangz cang lenzi, seialenpa haenh yvaeundeis.



▲Dingq fwen sim cix haenz, raeuz caemh doiq song hot.



▲Ngoenzneix banh cietfwen, vunz doxriengz bae dingq.



▲Dioq fwen beij sawhngz, vunz lai dinga maezmwd.



▲Diuq foux caiq ciengq go, vunz riuho ho haen.



▲Bonjciengj gaem ndaw fwngz, vunz ndawsim angq raeuh.